



Jednanski porjad Zwjazkowego předsydstwa Domowiny za wólbnu dobu 2025-2029

§ 1 Powšitkowne zasady džěławosće

- (1) Zwjazkowe předsydstwo Domowiny nawjeduje džěło třěšneho zwjazka mjez hłownymi zhromadźiznami.
- (2) Zestawa, nadawki a kompetency zwjazkowego předsydstwa rjaduje artikl 9, wotrězki 1 - 7 wustawkow Domowiny.
- (3) Zwjazkowe předsydstwo spjelnja swoje nadawki z/ze
 - rjadnymi a wurjadnymi posedženjemi,
 - džěłom prezidija po §12 tutoho porjada,
 - analytiskim a koncepcionelnym předdžěłom džěłowych wuběrkow a skupinow,
 - koordinaciju a integraciju cyłonardneho džěła we wothłosowanju z předsydstwami,
 - sobudžěłom čłonskich župow a towarstwow kaž tež z druhimi zwjazkarjemi,
 - skutkowanjom kóždého jednotliwego čłona zwjazkowego předsydstwa w swojim towarstwje a w zjawnosći,
 - aktiwnym zjawnostnym džěłom wo zaměrach třěšneho zwjazka a wo položanju a zajimach serbskeho ludu.
- (4) Zwjazkowe předsydstwo schadźuje so po artiklu 9, dypk 6 wustawkow Domowiny znajmjeńša štyri króć wob lěto. Nimo toho měłoso kóžde lěto klawsurne posedženje zwolać. Za to so lětny plan džěławosće nastaji, kotryž nimo terminow tež městnosć a wobsahowe ćežišća posedženjow postaji.

§ 2 Nadawki zwjazkowego předsydstwa

- (1) Zwjazkowe předsydstwo ma po artiklu 9 dypki 3 do 5 wustawkow Domowiny slědowace nadawki:
 - rozsudža wo prašenjach běžneho džěła Domowiny mjez hłownymaj zhromadźiznomaj,
 - postaja ćežišća džěławosće a rjaduje zawjazowace zamołwitosće za zwoprawdženje nadawkow,
 - přijimuje prawidłownje rozprawy předsydy a prezidija Domowiny,

- postaja zamołwitosće a nadawki prezidija,
- rjaduje wobsydstwo a financy Domowiny,
- přijimuje a schwali financne a hospodarske plany a rozprawy,
- wutwori dźěłowe wuběrki,
- postaja čezišća dźěławosće zarjada a wotrjadow a přijimuje wšě rozprawy wo dźěławosći,
- rozsudži nachwilnje wo nošerstwach institucijow,
- powoła a wotwoła resp. nominuje zastupjerjow Serbow do/z gremijow a přijimuje prawidłownje rozprawy wo jich dźěławosći,
- wobzamknje dźěłowe porjady zarjada a jeho wotrjadow,
- powoła a wotwoła hłowneho jednačela a jednačela Domowiny,
- wobzamknje wuznamjenjenske porjady Domowiny, kiž njejsu z wobstatkom wustawkow Domowiny,
- woli člonow mytowanskeho wuběrka,
- rozsudži wo plaćenju narunanja po art. 3 wotrězk 3 kaž tež wo wobsahu a wuměnjenjach zrěčenja,
- namjetuje hłownej zhromadźiznje po doporučenju změrcowskeho wuběrka wuwjazanje člona zwjazkowneho předsydstwa z wólbneje funkcije,
- rozsudža na zakładže doporučenja změrcowskeho wuběrka wo přikazanym nachwilnym wotpočowanju funkcije člona,
- rozsudža wo přiwaźaću nachwilneho złoženja wólbneje funkcije na zakładže podaća swójskeje wole.

(2) Dalše nadawki zwjazkowneho předsydstwa su:

- wothłosować wo změnje městneho plana struktury zarjada abo wotrjadow Domowiny,
- wothłosować wo namjeće wo přistajenju abo pušćenju sobudźěłačerja wyše zaslůžbneje skupiny 11 tarifa TV-L,
- wothłosować wo jednotliwych inwesticijach wyše 10.000 €,
- wothłosować wo nakupje abo předaću imobilijow.

§ 3 Posedženja zwjazkowneho předsydstwa

- (1) Wuradźowanja zwjazkowneho předsydstwa su po artiklu 9, dypk 7 wustawkow Domowiny zjawne. Wuradźowanja zwjazkowneho předsydstwa měli po župnych teritorijach pućować. Nowinska rěčnica Domowiny informuje medije tydžeń do posedženja wo wobsahach zjawneho dźěla posedženja. Zjawny dźěl posedženjow wusyła so jako livestream do syće, jeli techniske móžnosće na městnosći wuradźowanja to dowola. Zarjad Domowiny ma trěbne techniske wobstejnoscě rjadować.
- (2) Wuradźowanje dźěli so po potrebjce do zjawneho a njezjawneho dźěla. Zjawny a njezjawny dźěl posedženja matej so w namjeće za dnjowy porjad wupokazać.

- (3) Personalne prašenja maja so w kóždym padže w njezjawnym dźělu wuradźowanja a w njeprítomnosći potrjecheneho wobjednac.
- (4) „Nuprašowanja člonow Domowiny a hosći k serbskim naležnosćam“ a “rozprawa předsydy a člonow zwjazkowego předsydstwa wo dźěławosći třěšneho zwjazka mjez posedženjomaj zwjazkowego předsydstwa” měli stajny wobstatk posedženja być.
- (5) Člonojo zwjazkowego předsydstwa maja prawo, temy za wobjednanje do posedženja zwjazkowego předsydstwa zarjadej Domowiny pisomnje zapodać. Wo wobjednanju namjetow rozsudži zwjazkowe předsydstwo.
- (6) Nimo toho smě kóždy člon zwjazkowego předsydstwa do schwalenja dnjoweho porjada próstwu wo wuzamknjenje zjawnosće při wobjednanju wěsteho dypka dnjoweho porjada stajić. Wo próstwje wothłosuje so po § 7 wotrězki 7 do 9.
- (7) Člonojo zwjazkowego předsydstwa su winowaci, wo wšitkich w njezjawnym dźělu posedženja wobjednanych naležnosćach mjelčeć.
- (8) Rjadne posedženja zwjazkowego předsydstwa zwoła předsyda Domowiny na zakładže schwaleneho lětneho plana dźěławosće.
- (9) Wurjadne posedženje zwoła předsyda po pisomnym žadanju znajmjeńša štwórciny člonow zwjazkowego předsydstwa, třoch towarstwow abo prezidija (hlej wustawki Domowiny artikl 9, dypk 6). Wone ma so w běhu dweju tydzenjow přewjesć.
- (10) Přeprošenje z namjetom za dnjowy porjad a předłohami posedženja ma kóždy rjadny člon zwjazkowego předsydstwa najpozdžišo 7 dnjow do wuradźowanja digitalnje dóstać. Jeli sej to adresat přeje, móža so jemu podložki tež z póštu sprosředkować. Wo naležnosćach, kiž njesu w připóslanym namjeće za dnjowy porjad zapisane, smě so jenož potom wuradźować a rozsudzić, hdyž njeda so naležnosć přestorčić a zwjazkowe předsydstwo wobjednanju přihłosuje.
- (11) Přeprošenje z namjetom za dnjowy porjad a předłohami posedženja dóstawaja tež hlowna jednačelka a jednačel, nawodnica Rěčneho centruma WITAJ, jeje zastupjer a referenca zarjada Domowiny. Samsne plaći za předsydu rewizijnego wuběrka a předsydu změrcowskeho wuběrka, jeli sej to přejetaj.
- (12) Podložki zjawneho dźěla posedženja dóstawaja tež županojo a předsydzja člonskich towarstwow, kotřiž njesu z člonom zwjazkowego předsydstwa, jeli sej to přeja.
- (13) Podložki njezjawneho dźěla posedženja dóstawaja wosoby po § 5 dypk 10.
- (14) Posedženja zwjazkowego předsydstwa přewjeduja so po móžnosći realnje na postajenej městnosći. Wotpowědnje artiklej 7, wotrězk 3 wustawkow je wobdźělenje po elektroniskim puću (na přikład přez telefon abo widejowu konferencu) abo w měšanej formje z přítomnymi kaž tež z wobdźělnikami přez widejowu konferencu, druhe medije abo telefon móžne. Wobdźělenje po elektroniskim puću je jenož z legitimaciskimi a přistupnymi datami móžne, kotrež za wotpowědne posedženje plaća. Daty so we wosebitej mejlce sčasom do zhromadźizny sprosředkuja.

§ 4 Nawjedowanje posedženjow

- (1) Posedženja nawjeduje předsyda, w padže jeho zadžěwanja městopředsydaj. Za wobjednanje jednotliwych dypkow dnjoweho porjada móže prezidij druhich zamołwitych zasadzić.
- (2) Předsyda a městopředsydaj tworja posedženski prezidij. Posedženski prezidij je za porjadny wotběh posedženja kaž tež za dodžerženje wustawkow Domowiny a jednanskeho porjada zwjazkowego předsydstwa zamołwity.
- (3) Nawoda posedženja ma slědowace nadawki:
 - posedženje zahajić a přitomnych powitać,
 - přizjewić, zo so wotběh zjawneho dźěla posedženja natoči a zo njejsu žane dalše natočenja dowolene,
 - přizjewić, zo so zjawny dźěl posedženja digitalnje jako livestream do syće wusyła,
 - přitomnosć a zamołwjenja zwěsćić,
 - wobzamknjenjakmanosć zwěsćić,
 - zajatosć zwěsćić,
 - wo dnjowym porjedže wothłosować dać,
 - diskusiju k jednotliwym dypkam nawjedować a z wobsahowym rezimejom zakónčić,
 - konkretny tekst wobzamknjenja měł wón do wothłosowanja předčitać resp. posłowny namjet za wobzamknjenje sformulować abo přeformulować,
 - wo předłohach a druhich namjetach k wobzamknjenju wothłosować dać,
 - rezultat wothłosowanja zwěsćić (tři kategorije: za namjet/za naraženje, přećiwo namjetej/pšešiwo naraženju a so hłosa wzdám/se głosa zdžaržyjom),
 - přiwzaće abo wotpokazanje namjeta zwěsćić,
 - wo wokolnym abo listowym wothłosowanju naležnosće rozsudzić dać,
 - wo wotsadženju dypkow dnjoweho porjada resp. wo wróćodaću předłohow k dalšemu wobdžělanju w prezidiju abo dźělowych wuběrkach rozsudzić dać,
 - porjadny wotběh posedženja na zakładže jednanskeho porjada zawěsćić a domowe prawo wukonjeć a
 - posedženje zakónčić.

§ 5 Wobdžělenje na posedženjach

- (1) Čłonojo zwjazkowego předsydstwa su winowaci, so na posedženjach wobdžělić. W padže zadžěwanja su winowaci, předsydu abo sekretariat zarjada Domowiny do posedženja wo tym informować.
- (2) Lisćina za wupłaćenje posedženskich pjenjow płaći zdobom jako lisćina přitomnosće. Kóždy čłon zwjazkowego předsydstwa zapisa so ze swojim podpismom do lisćiny přitomnosće a wupjelni lisćinu za zarunanje jězbných wudawkow, jeli spjelni k tomu trěbne wuměnenja po płaćiwym rjadowanju.

- (3) Čłonojo zwjazkowego předsydstwa smědža so digitalnje na posedženju wobdželić.
- (4) Digitalne wobdželenje zapisa protokolantka do lisčiny přitomnosće.
- (5) Čłon zwjazkowego předsydstwa, kotryž chce posedženje dočasnje wopušćić, ma to nawodže posedženja zdželić.
- (6) Po artiklu 9, dypk 2 wustawkow Domowiny mataj so hłowna jednaćelka a jednaćel na posedženjach zwjazkowego předsydstwa z poradźowacym hłosom wobdželeć. Samsne přitřechi za nawodnicu Rěčneho centruma WITAJ a jeje zastupjerja, tematizuja-li so kubłansko-politiske prašenja. Nowinska rěčnica, referentka za naležnosće třěšneho zwjazka a referent za gremijowe a ministerialne naležnosće so tohorunja na posedženjach wobdželeja.
- (7) Předsyda rewizijnego wuběrka kaž tež předsyda změrcowskeho wuběrka mataj po artiklu 9, dypk 2 wustawkow Domowiny prawo, so na wuradźowanjach zwjazkowego předsydstwa z poradźowacym hłosom wobdželeć.
- (8) Zastupjer Domowiny we FUEN-prezidiju ma prawo, so z poradźowacym hłosom na posedženjach zwjazkowego předsydstwa wobdželeć.
- (9) K zjawnym posedženjam ma kóždy zajimc přistup. Zajimcy pak nimaja prawo, do jednanjow zapřimnyc abo wotběh posedženja mylić.
- (10) Na njezjawnym džělu wobdželeja so čłonojo zwjazkowego předsydstwa, hłowna jednaćelka a jednaćel, referentka za naležnosće třěšneho zwjazka, nowinska rěčnica, referent za gremijowe a ministerialne naležnosće kaž tež protokolantka / protokolant ze zarjada. Rjadowanja § 7, dypk 13 nastupajo zajatosće maja so dodžeržeć. Jeli sej maćizna předwidžaneho dypka to žada, smědža so dalše wosoby na njezjawnym džělu přeprošyc. Na njezjawnym džělu smětaj so tež předsyda rewizijnego wuběrka a předsyda změrcowskeho wuběrka wobdželić.

§ 6 Wobdželenje na diskusiji

- (1) Čłonojo zwjazkowego předsydstwa a prezidija, hłowna jednaćelka, jednaćel a wobdželnicy po § 5 dypki 6 do 9 tutoho porjada, kaž tež přeprošeni hosćo maja prawo, so słowa jimać, hdyž jim nawoda posedženja słowo přepoda. Kóždy diskutant měł so jenož dwójce k samsnej naležnosći wuprajic. Słowo so po rjedže přizjewjenjow přepodawa. Wo rěčenskim prawje njeprošenych hosći rozsudža posedženski prezidij.
- (2) Čłon zwjazkowego předsydstwa, kiž chce k jednanskemu porjadej rěčeć, přizjewi to ze zběhnjenjom wobeju rukow. Wón dóstanje potom hnydom słowo.
- (3) Hdyž wuprajitej so žadanje abo namjet k wothłosowanju, smětaj zasadnje jedyn čłon zwjazkowego předsydstwa za to a jedyn přećiwo tomu rěčeć. Potom so wothłosuje.
- (4) Rěčny čas móže so wot posedženskeho prezidija po potřebnosći wobmjezować. Hdyž so hižo k wěcy njerěči, ma nawoda posedženja prawo, rěčnikej słowo sčazać.

- (5) Jednanski porjad dowola čłonom zwjazkowego předsydstwa w běhu posedženja scěhowace namjety:
- wróćenje naležnosće do prezidija, do džěłoweje skupiny resp. do džěłowego wuběrka abo zarjadej Domowiny, zo by so předłoha k tomu přihotowała resp. předležaca předłoha so předžěłała,
 - wotsadženje naležnosće z dnjoweho porjada resp. přestorčenje wobjednanja,
 - wokolne wothłosowanje po posedženju, ručež předleži předžěłany namjet za wobzamknjenje,
 - zakónčenje diskusije k naležnosći,
 - wothłosowanje wo předloze resp. wo namjeće k wobzamknjenju,
 - přetorhnjenje abo zakónčenje posedženja,
 - wuzamknjenje zjawnosće,
 - žadanje za tajnym wothłosowanjom abo za wothłosowanjom po mjenje,
 - naprašowanje wěcywustojnych wosobow a
 - přepodaće pońmocy k doskónčnemu rozsudej prezidijej, předsyđe abo zarjadej Domowiny.
- (6) Čłon zwjazkowego předsydstwa, kotryž je so k diskusiji přizjewił a njeje zakónčeneje diskusije dla wjace słowo dóstał, smě swój přinošk pisomnje předsyđe zapodać. Přinošk so protokolej připožiji.
- (7) Do wothłosowanja wo předlohach a namjetach za wobzamknjenje smě kóždy čłon zwjazkowego předsydstwa wosobinske wujasnjenje wotedać. K tomu přepoda jemu nawoda posedženja po wotpowědnym přizjewjenju słowo. Tajke wosobinske wujasnjenje smě jenož poprawa wopačnych wuprajenjow abo wotwobaranje wosobinskeho nadběha wobsahować.

§ 7 Wothłosowanja a wobzamknjenja

- (1) Po artiklu 7, dypk 4 wustawkow Domowiny je zwjazkowe předsydstwo wobzamknjenjakmane, hdyž je wjace hač połojca jeho čłonow přítomna.
- (2) Namjet je přiwzaty, hdyž je wjetšina přítomnych hłosakmanych za namjet hłosowała, dalokož njeje to w tutym porjedze abo we wustawkach hinak postajene. Při samsnej ličbje hłosow za abo přećiwo namjetej je namjet wotpokazany.
- (3) K wothłosowanju dóstanje kóždy čłon hłosowanske kartki.
- (4) Wotodate hłosy digitalnje přizamknjenych čłonow zwěsća nawoda posedženja z pomocu wobrazowki. Za čas wothłosowanja a wuličenja dyrbi wosoba, kotraž wothłosuje, na wobrazowce widžeć być. Jeli njeje wosoba widžeć abo njeda so wotedaty hłos přirjadować, so tutón njeliči.
- (5) Namjet k wobzamknjenju dyrbi pisomnje abo ertnje jasnje sformulowany być, prjedy hač so wo nim wothłosuje. Wo kóždym namjeće so jednotliwje wothłosuje. Hdyž předleža wjacore namjety k wobzamknjenju nastupajo samsnu naležnosć, potom

wothłosuje so najprjedy namjet, kiž po wobsahu najbóle wotpowěduje zaměrej wobzamknjenja.

- (6) Signalizuje-li jedne člonske towarstwo z pisomnym wopodstatnjenjom do posedženja k namjetej za wobzamknjenje sylne wobmyslenja, ma so předsydstwo tutoho towarstwa do wothłosowanja słyšeć. Słyšenje předsydstwa tutoho towarstwa so přewjedže w zwjazkowym předsydstwje.
- (7) Wothłosuje so zasadnje zjawnje ze zběhnjenjom hłosowanskeje kartki.
- (8) Hdyž sej to jedyn člon zwjazkowego předsydstwa žada, potom so po mjenje abo tajnje wothłosuje. Předležitej wobaj namjetaj, potom so tajnje wothłosuje. Při wothłosowanju po mjenje předčita nawoda posedženja mjena wotpowědneho člona zwjazkowego předsydstwa, kiž dyrbi potom prajić, hač wón "za namjet" abo "přećiwo namjetej" hłosuje resp. so hłosa wzda. To so we wotpowědnej lisćinje dokumentuje a protokolej přida. Člonojo zwjazkowego předsydstwa, kiž njesu wobzamknjenju přihłosowali, smědža sej žadać, zo so to w protokolu naspomni.
- (9) Po artiklu 7, dypk 4 wustawkow Domowiny móže zwjazkowe předsydstwo tež po pisomnym puću rozsudy tworić. Wo tym ma zwjazkowe předsydstwo abo prezidij rozsudzić. Za wobzamknjenje po pisomnym puću dyrbi so znajmjeńša položca člonow na wothłosowanju wobdžělić. Płaća zasady z § 7 dypk 2 tutoho porjada.
- (10) Hdyž so wuměnjenja za plaćiwe wobzamknjenja zasadnje změnja, móže so wotpowědne prašenje znowa w zwjazkowym předsydstwje wobjednać. Při tym ma so wo tym rozsudzić, hač so dotalne wobzamknjenje zběhnje.
- (11) Wólby a personalne rozsudy přewjeduja so w tajnym wothłosowanju. Smě so zjawnje wolić, hdyž njeje žadyn člon zwjazkowego předsydstwa přećiwo tomu. Wolena je zasadnje wosoba, kotraž dóstanje wjace hač položcu hłosow přitomnych hłosakmanyh člonow zwjazkowego předsydstwa. Při wjacorych mjenach na jednym wólbnyh lisćiku su ći wuzwoleni, kotřiž su po rjedže najwjac hłosow dóstali. Při runosći hłosow ma so wuša wólba přewjesć. Woleny je potom tón, kiž docpěje we wušej wólbje wjetšinu hłosow.
- (12) Tajne, listowe wólby su móžne. Wo tym ma zwjazkowe předsydstwo abo prezidij rozsudzić.
- (13) Člonojo zwjazkowego předsydstwa njesmědža so na wobjednanju a schwalenju naležnosćow wobdžělić, hdyž móže wobzamknjenje jim wosobinsce, jich swójbnyh resp. přiwuznym přenjeho stopjenka abo institucijam, kiž woni juristisce zastupuja, bjezposředne lěpšiny abo njelepšiny přinjesć. Potrjeheny člon zwjazkowego předsydstwa dyrbi sam swoju zajatosć do wobjednanja wotpowědneje naležnosće přizjewić. Wón smě so w padže zjawneho džěla posedženja k hosćom sydnýć, w padže njezjawneho džěla pak dyrbi posedžensku rumnosć wopušćić. Hdyž wobsteja dwěle na zajatosći resp. njezajatosći, potom rozsudži so w njepřitomnosći potrjeheneho. To samsne plaći za wšitkich dalších přitomnych abo digitalnje přitomnych.

§ 8 Protokol zjawneho džěla posedženja

- (1) Wo kóždym zjawnym posedženju zdžěła so protokol wobzamknjenjow. Jako pomocny srědk za protokolowanje zjawneho džěla posedženja wužiwa so natočenje.
- (2) Protokol zjawneho džěla ma wobsahować:
 - termin, městnosć, započatk a kónc wuradźowanja,
 - mjeno nawody/nawodow zeńdženja,
 - přitomnosć člonow a hosći,
 - dnjowy porjad,
 - čisła a titule wobjednanych předłohow,
 - wobzamknjenja z formulaciju namjeta, z wuslědkom wothłosowanja a z běžnym čisłom tuteje wólbneje doby,
 - nadawki, kiž su so druhim gremijam přepodali,
 - wosobinske stejišćo, hdyž sej to člon zwjazkowego předsydstwa žada a
 - teksty rozprawow k bytostnym naležnosćam jako přidawk k protokolej.
- (3) Člonojo zwjazkowego předsydstwa a jeho stajni hosćo dóstanu w běhu jednoho tydženja po posedženju na digitalnym puću načisk protokola a smědža k protokolej pokiwy abo korektury zapodać. Doskónčny načisk přepoda so z podložkami za přichodne posedženje.
- (4) Županojo a předsydža člonskich towarstwow, kiž njejsu z člonom zwjazkowego předsydstwa, dóstanu protokol k informaciji, jeli sej to přeja. Samsne plaći za předsydu rewizijnego wuběrka a předsydu změrcowskeho wuběrka.
- (5) Protokol a spjelnjenje wobzamknjenjow kontrolujetej so na přichodnym zjawnym wuradźowanju zwjazkowego předsydstwa.

§ 9 Protokol njezjawneho džěla

- (1) Wo kóždym njezjawnym posedženju zdžěła so wuslědkowy protokol.
- (2) Wobzamknjenja njezjawneho džěla maja so ze separatnym běžnym čislowanjom protokolować ("n" před čisłom).
- (3) Wobsteji móžnosć jednotliwe wuprajenja po słowje do protokola přewzać.
- (4) Člonam změrcowskeho wuběrka ma so na žadanje protokol pod dohladom w zarjedže spřistupnić.
- (5) Protokol njezjawneho džěla kontroluje so na přichodnym posedženju zwjazkowego předsydstwa.

§ 10 Předłohi

- (1) Předłohi do zwjazkowego předsydstwa smědža zapodać:
 - prezidij,
 - předsyda a městopředsydaj Domowiny,
 - čłonojo zwjazkowego předsydstwa,
 - dźěłowe wuběrki resp. dźěłowe skupiny,
 - rewizijny a změrcowski wuběrk Domowiny,
 - předsydstwa čłonskich župow a towarstwow, kaž tež
 - zarjad Domowiny a
 - Rěčny centrum WITAJ.
- (2) Předłohi zdžěłaja so, hdyž so trěbnosć wobjednanja wotpowědneho prašenja ze stron wolenych gremijow třěšneho zwjazka, předsydstwow čłonskich župow a towarstwow kaž tež zarjada Domowiny zwěsći, hdyž zwjazkowe předsydstwo wotpowědny nadawk wobzamknje abo posedženski plan zwjazkowego předsydstwa to předwidži.
- (3) Předłohi měli so zasadnje prezidijej k předwobjednanju přepodać, zo by móhl zwjazkowemu předsydstwu doporučenje k doskónčnemu wobjednanju předłohow přepodać. Referentka za naležnosće třěšneho zwjazka rjaduje, čisluje a spřistupnja, resp. wozjewja předłohi we wothłosowanju z prezidijom.
- (4) Za přihotowanje předłohow ma so wosebity formular wužiwać (hlej přiłoha). Kóždy předłoha ma swoje čisło (běžne čisło + lětoličba). Předłohi, kiž so w prezidiju na zakładze § 6, dypk 5, smužka 10 abo § 12, dypki 2, 4 abo 5 tutoho jednanskeho porjada dorozsudža, maja před běžnym čisłom přidawk "P". Předłohi, kotrež so w zwjazkowym předsydstwje doskónčnje wobjednaja a schwala, maja přidawk "ZP". Wobě družinje předłohow so separatnje ličitej a składujetej. Wopodstatnjenje za namjet k wobzamknjenju přida so we wotpowědnej přiłoze.
- (5) W předłohach, kiž služa jenož k informaciji, zapisuje so do rubriki "Namjet za wobzamknjenje" pasus, zo so informacija na wědomje bjerje.
- (6) Financne wuskutki wobzamknjenjow maja so mjenować a zarjad Domowiny měł financujomnosć do wobjednanja w prezidiju pruwować a z podpismom hłowneje jednaćelki, jednaćela abo wotrjadnika wotrjada zličbowanje wopodstatnić.
- (7) Hdyž so w běhu jednanjow zwjazkowego předsydstwa wotchilacy namjet k wobzamknjenju formuluje, potom pisa so nowa formulacija do přehlada předłohow.

§ 11 Wutworjenje dźěłowych wuběrkow

- (1) Zwjazkowe předsydstwo abo prezidij wutworitej po potrebjce k analytiskemu a koncepcionelnemu wobdžělanju naležnosćow dźěłowe wuběrki. Kóždy wuběrk měł ze znajmjeńša 5 wosobow wobstać. Postajeja so zestawa a nawoda dźěłoweho wuběrka,

jeho naměstnik, po wobsahu přišlušny zamołwity zarjada, wobsahowe zaměry džěławosće a doba skutkowanja.

- (2) Wuběrki maja prawo, stajíc próstwu wo juristisku poradu na prezidij.
- (3) Za wotběh posedženjow džěłowych wuběrkow płaća w zasadze postajenja jednanskeho porjada zwjazkowego předsydstwa wotpowědnje. Wuradžowanja wuběrkow su zasadnje njezjawne. Wuwzaća su móžne. Čłonom zwjazkowego předsydstwa a prezidija je přistup w kóždym času móžny.
- (4) Protokole wuradžowanjow džěłowych wuběrkow dóstawaja nimo wuběrkownikow tež čłonojo prezidija. Čłonojo zwjazkowego předsydstwa smědža sej protokole požadać.
- (5) Jako čłonojo džěłowych wuběrkow móža so nimo čłonow zwjazkowego předsydstwa a prezidija dalši zastupjerjo župow a towarstwow kaž tež fachowcy powolać. Woni podleža samsnemu rjadowanju dowěrliwosće kaž čłonojo zwjazkowego předsydstwa.
- (6) Wuběrki rozprawjeja zwjazkowemu předsydstwu abo prezidijej wo wuslědkach a džěławosći swojeho skutkowanja a předpołoža wotpowědne namjety jako předłohi k wobjednanju a schwalenju.
- (7) Předsydža wuběrkow smědža na zakładze naprašowanjow medijow abo po swójskim rozsudze wuběrkownikow zjawnosć k tematiskim čěžišćam njezjawnych posedženjow wuběrkow informować. Při tym ma so wobkedžbować, zo ma so jednać wo powšitkowne informacije džěławosće wuběrkow, nic pak wo naćiskach, kiž ma zwjazkowe předsydstwo dodiskutować a wobzamknyć.

§ 12 Prezidij

- (1) Po artiklu 10, dypk 1 wustawkow Domowiny słušeja do prezidija předsyda Domowiny, jeho městopředsydaj a dalšej čłonaj zwjazkowego předsydstwa, kotrejuž na namjet předsydy zwjazkowe předsydstwo powoła.
- (2) Po artiklu 10 dypk 3 wustawkow Domowiny postaja zwjazkowe předsydstwo slědowace zamołwitosće prezidija:
 - a. přihotować wobsahowje posedženja zwjazkowego předsydstwa,
 - b. poradžować zwjazkowe předsydstwo we wobsahowych a wažnych organizatoriskich prašenjach a k tomu předpołožić trěbne předłohi,
 - c. poradžować předsydu Domowiny w jeho běžnej džěławosći,
 - d. wutworić w nadawku zwjazkowego předsydstwa nachwilne džěłowe skupiny resp. wuběrki a jich džěło koordinować,
 - e. poradžować předsydu a jednaćelstwo při koordinaciji běžneje džěławosće zarjada Domowiny a Rěčneho centruma WITAJ a přijimać k tomu trěbne informacije,
 - f. přihotować hłowne zhromadźizny Domowiny a nawjedować wudžělanje rozprawy wo zwoprawdženju nadawkow džěłowych směrnicy zwjazkowego předsydstwa a
 - g. rozsudzić wo slědowacych prašenjach:

- chwytne trěbne stejišća Domowiny k naćiskam prawniskich předpisow a k aktualnym prašenjam,
 - stejišća Domowiny k předewzaćam regionalneho planowanja,
 - delegowanje kulturnych skupin w nadawku Domowiny, projekty kulturneje wuměny a službne jězby čestnohamtskich zastupjerjow Domowiny do wukraja,
 - koncepty za róčnicy a jubileje,
 - naprawy w zwisku z wobhospodarjenjom imobilijow Domowiny,
 - nadawki k prawniskej poradźe Domowiny,
 - kónčna redakcija za stejišća, rezolucije, brošurki, memorandumy a podobne wozjewjenja Domowiny, kiž so w zjawnosći rozšěrjeja,
 - wobdźělenje Domowiny na projektach druhich nošerjow,
 - koncepty za wopomnjenske dny,
 - z běžneje džěławosće třěšneho zwjazka wotwodźene nadawki za džěłowe wuběrki zwjazkowego předsydstwa.
- (3) Zwjazkowe předsydstwo informuje so na kóždym posedženju wo džěławosći prezidija a dóstawa pisomny přehlad rozsudow posedzenjow prezidija z podložkami za swoje přichodne posedženje.
- (4) Posedženja prezidija su zasadnje njezjawne. Čłonojo zwjazkowego předsydstwa smědža so na posedženjach wobdźěleć. Čłonojo zwjazkowego předsydstwa maja prawo, prezidijej namjety za wobjednanje naležnosćow zapodać.
- (5) Džěławosć prezidija rjaduje wosebity jednanski porjad, kiž zwjazkowe předsydstwo schwali.

§ 13 Winowatosće čłonow zwjazkowego předsydstwa

- (1) Nimo aktiwneho wobdźělenja na posedženjach zwjazkowego předsydstwa ma čłon zwjazkowego předsydstwa wosebite winowatosće napřećo župje resp. towarstwu, kotraž/kotrež je jeho za wólby do zwjazkowego předsydstwa nominowała/o. Wón ma předsydstwo župy resp. towarstwa prawidłownje wo jeho skutkowanju informować, předłohi do posedzenjow z nimi diskutować, wobzamknjenja zwjazkowego předsydstwa rozkłasć a jich přesadjenje podpěrować.
- (2) Wobzamknjenja su za kóždoho čłona zwjazkowego předsydstwa jenak zwjazowace. Žadyn čłon zwjazkowego předsydstwa nima po wotumje wjetšiny gremija prawo, přesadjenje wobzamknjenjow blokować a napřećiwne aktiwity přewjesć.
- (3) Hdyž zwjazkowe předsydstwo postaji, zo njesmě so wo wěstych prašenjach zjawnje informować, ma kóždy čłon gremija winowatosć k mjelčenju. Tuta winowatosć wobsteji hać do wuwjazanja na zakładźe rozsuda zwjazkowego předsydstwa. Winowatosć k mjelčenju plaći bjez wobmjezowanja za personalne daty.
- (4) Kóždy čłon zwjazkowego předsydstwa je k aktiwnemu zjawnostnemu džěłu namołwjeny.

§ 14 Zjawnostne dźěło

- (1) Zjawnosć a žurnalisća přeprašuja so z nowinskim wozjewjenjom a z nawěškom na zjawne wuradźowanja zwjazkowego předsydstwa.
- (2) Dnjowy porjad zjawneho dźěla so najpozdžišo 3 dźělowe dny do posedženja w serbskej a němskej rěči w interneće wozjewi.
- (3) Podložki zjawneho dźěla posedženja wozjewja so w zapodatej rěči tohorunja najpozdžišo 3 dźělowe dny do posedženja na internetnej stronje Domowiny. Z toho wuwzatej stej rozprawa předsydy a rozprawa prezidija Domowiny. Wo dalšich wuwzacach smětej zwjazkowe předsydstwo a prezidij rozsudźić.
- (4) Wobzamknjenja zjawneho dźěla posedzenjow zwjazkowego předsydstwa měli so w běhu jednoho tydženja na internetnych stronach Domowiny wozjewić.
- (5) Po posedženju zhotowi nowinska rěčnica medijowe wozjewjenje wo hłownych ćežiščach a wuslědkach zeńdženja. Po wothłosowanju z jednym člonom prezidija posrědkuje so tute redakcijam, člonam zwjazkowego předsydstwa a dalšim zajimowanym adresatam. Zdobom ma so wone na internetnej stronje Domowiny wozjewić.
- (6) Rozsudy interneho resp. dowěrliwego razu, kotrež njesmědža so wozjewić, so na posedženju konkretnje pomjenuja.

Dalokož so w tutym jednanskim porjedže funkcije a pomjenowanja po muskim abo žónskim splahu wopisuja, měni so z tym runohódnje žónski a muski splah.

Jednanski porjad zwjazkowego předsydstwa za wólbnu dobu 2025-2029 schwali so na posedženju zwjazkowego předsydstwa dnja 26.09.2025 w Miłorazu a nabudže z tym płaćiwosć.